

# Teilatuko lizarra

**KOLDO IZAGIRRE**

 **Susa** poesia

Liburu honen salneurria: 3 € + BEZ.

Ordainketa egiteko, edo liburu gehiago eskuratzeko:

<http://susa-literatura.com/ebook>

© 2006 Koldo Izagirre

© edizio honena: Susa

cc-by-sa Creative Commons Aitortu Partekatu

<http://creativecommons.org/licenses/by-sa/3.0/deed.eu>

Lehen edizioa paperean: 2006ko apirila

Edizio hau: 2011ko ekaina

Susa: 317 posta kutxa / 20800 Zarautz

Adoain Aita 92 / 31015 Iruñea

Zubitalde 21 / 48195 Larrabetzu

Telefona: 943 83 26 55

Elektroposta: [susalit@armiarma.com](mailto:susalit@armiarma.com)

Webgunea: <http://susa-literatura.com>

# EDITOREAREN OHARRA

**Idatziak** oro, eta poesiak bereziki, badauka bere musika, edo musikaltasuna: kadentzia batean esaten zaizkigu esatekoak, beren motelaldi eta arinaldiekin; kakotxak eta puntuak isilaldi labur eta luzeak ditugu... eta noski, hizkuntza guztiak dira hots-sistema konplexu samarrak, alegia, aberatsak. Honek ez du esan nahi poema batek *berea* ez den beste musikarik onar ez dezakeenik. Testuaren musikaltasuna gorabehera, kantagarri izan zitekeela uste ez genuen poema mordoa kantatzen dugu. Eskultoreak materiari bezala, testu-masari forma kendu dio musikariak, kantariak.

Idatzia, poema, musikagarria da. Baina kantua, irakurgarria ote da?

Musikak poemaren beste alderdi bat erakusten duen bezala, irakurketak kantuaren dimentsio berri bat erakusten digu musika erantzitakoan. Har deza-

gun balada bat, irakur dezagun astiro: narrazio luzearen mailakatze bera dauka, nobela luze bat da, elipsian emana. Har dezagun koplak zahar bat, gure lirika-  
ren irudi ederrenetakoak utzi dizkigute egile anoni-  
moek.

Kantuan, idatziak ahozko tasunera hurbildu behar du, bestela oso gutxitan kontuan hartzen diren aldaerak zaindu behar dira: hitzen arteko loturak, kontsonante-bokalen oreka, barne-etenak... Esangarria izan behar du aurrena testuak, kantatu ahal izango bada. Letragintza, beraz, genero literario berezia bihurtzen da. Bere legeak ditu; hobeto esanda, bere printzipioak. Genero apala da, artisautza nahi baduzue, baina ez horregatik erraza. Apalean bertan zaila, errazkeriaren arriskua daukana.

Askotan menostu egin den genero honen adibidea dugu *Teilatuko lizarra* liburuan proposatzen duguna: Koldo Izagirrek hogeita hamar urtetik hona argitaratutako kantu eta kantugaiak, eta gordean zeuzkan beste hainbat letra berri. Sehaska kantu xaloak eta

gaiztoak, blues malenkoniatsuak, baladak, koplak... denetarik aurkituko duzue hemen, eta baita ere kantu kultua esan genezakeena, frantsesek *chanson à paroles* esaten dutena, kantu berbadunak, “zer edo zer” molde jasoan esaten duten parolak, letrak.

*Joseba Tapiarentzat,  
koplatzeak ematen dizkidan lanak  
aipatzen dizkiodan aldiro  
perfekziokeriaren arriskuaz jardunda  
kontsolatzen nauelako eta, ondoren,  
soinua jotzen hasten delako alegia deusez,  
notak eskura baletozkio bezala.*

---

# BALDINTZA SUBJEKTIBOAK

Ītsas handiak ahoa zabal  
portutik urrun irtenda  
mundu berririk ez dago eta  
loturik hobe omen da  
halere bihotz duenak badu  
barkua non bete berba

arruta sarri huts egin ohi dut  
oker zuzenduta lema  
ahula baita bizi-faroa  
argitzen duen linterna  
halere garaiz ikasi nuen  
barkua non bete berba

orratza galduta nork dezake  
portu onean azerta  
laguna uste nuenak maiz du  
nire kontra jo alerta  
halere beti aurkitu ohi dut  
barkua non bete berba

munduko zazpi putzu gaziak  
ez dira inoiz ur bera  
gu garamatzen ontziak orain  
gorria dakar ubera  
halere jator eskaintzen dizut  
nik barkua bete berba

hautsiko zaigu erdiko masta  
urratuko zaigu bela  
beldurak digu bilakatuko  
ahoa hitzen logela  
halere ez dut galtzen utziko  
nik barkua bete berba

itsas hondotik datorren baga  
harkaitzak lezake ema  
inoiz isilduko ez nautenik  
ez dezaket zinez berma  
halere beti ekarriko dut  
nik barkua bete berba

1997

Musika: Francisco Garcia Alvarez



---

# ZURETZAT

Eguzkia eskuetan hartu  
eta intxaurre azala kraskatu  
zuretzat  
zuretzat

ene poemak erre  
eta keak hitzak dibuja ditzan utzi  
zuretzat  
zuretzat

eskuak ikus diezazkiozun  
elektrikari tiranteak ebatsi  
zuretzat  
zuretzat

gauaren bizkar bustiaz  
pertxero bat egin  
zuretzat  
zuretzat

zapataren lokarriaz  
itsasoak itzal batean bildu  
zuretzat  
zuretzat

zuretzat  
ezagutzen ez dituzun  
mila zuretzat

1976

---

# ERAIKUNTZA GREBAN

**a**ztoramen handi batek hartua du hiria  
eraikuntzak duelako gaur erabaki greba  
nekatua omen dago uztarriko idia  
bat eginik daude orain Bizkaia eta Magreba

gorriz behar da markatu egutegian data  
eraikuntzak duelako gaur erabaki greba  
beherago ezin omen bertan gora soldata  
bat-batean lana dute laga bertan behera

hiria museo dugu eskurik bako harri  
eskorga pala plomada pikotxa mila tresna  
umezurtz gelditu dira guztion ikusgarri  
eraikuntzak duelako gaur erabaki greba

inork ez daki zergatik baina denok dakigu  
eraikuntzak duelako gaur erabaki greba  
bihar izanen garela munstro baten gatibu  
hiri osoan haserre ezkutu bat erne da

trafikoa moteldu da lanera heldu ezin  
eraikuntzak duelako gaur erabaki greba  
amodiozko hitzordu mordoa da huts egin  
horrelaxe dute pizten alferrek beti gerla

paretak beteak daude pintaketaz afixez  
eraikuntzak duelako gaur erabaki greba  
piketeak hor dabilta amenazuzko hitzez  
halakoz beteko balitz Siberiako tren

hodei beltzez estali da hiriaren sabaia  
eraikuntzak duelako gaur erabaki greba  
ez lege barruko greba baizik opor salbaia  
mila eta bat barrikada goiz honetan erre da

langileek utzi naute malenkoniak jota  
gai baitira obratzeko nik atzo egin ametsa  
tristuraz gaixorik nago ezer ez zait inporta  
eraikuntzak duelako gaur erabaki greba

---

# KAPRITXO ZAILA

beti nahi izan nuen koplaka ikasi  
lanbroak itsutzen du gure bokalea  
alferrik daude orain talaiko banderak  
ingudean mailuak eguna du hasi

beti nahi izan nuen koplaka ikasi  
ortzadarra sortu du fuelak uretan  
gaur ez du beste deusik umeak gogoan  
hizkuntza arrotzean ezin du idatzi

beti nahi izan nuen koplaka ikasi  
txintxorroen lotura erraz lasaitzen du  
hondoko baga beltzak azpitik jotzean  
kardala baretzeko neu nago moilarri

beti nahi izan nuen koplaka ikasi  
entzuten nuenean Abante gustixe!  
urtu egiten nintzen uberari beha  
zer pentsatu ohi nuen neuk ere ez dakit

beti nahi izan nuen koplaka ikasi  
zuhaitzik ederrena ontzi baten masta  
Matzakuko parolak zazpi segundoro  
nire bihotzak baino lasaiago argi

1997

---

# NI GIZON ERGELA NAIZ

**N**i gizon ergela naiz ta  
—hala haiz tamalez!  
ni gizon ergela naiz ta  
aurkitu nahi dut egia  
—hori baietz!  
—hori baietz!  
aurkitu nahi dut egia  
estropozotan daramat  
nire bizitza erdia

ni gizon zuria naiz ta  
—hala haiz tamalez!  
ni gizon zuria naiz ta  
ez dut esaten gezurrik  
—hori ezetz!  
—hori ezetz!  
ez dut esaten gezurrik  
haritzak ez du ematen  
nire gustuko ezkurrik

ni gizon motela naiz ta  
—hala haiz tamalez!

ni gizon motela naiz ta  
laburra daukat urratsa  
—hori baietz!  
—hori baietz!

laburra daukat urratsa:  
banderapean joateko  
ez naiz eraman erraza

ni gizon epela naiz ta  
—hala haiz tamalez!

ni gizon epela naiz ta  
ez nau berotuko suak  
—hori ezetz!  
—hori ezetz!

ez nau berotuko suak  
ez ditut beti aditzen  
aberriaren mezuak

ni gizon itsua naiz ta  
—hala haiz tamalez!

ni gizon itsua naiz ta  
maite ditut beltzaranak



—hori baietz!

—hori baietz!

maite ditut beltzaranak  
librea nahi omen zuen  
Kuba Sabino Aranak

ni gizon gorria naiz ta  
—hala haiz tamalez!

ni gizon gorria naiz ta  
ez daukat barkamenikan  
—hori ezetz!  
—hori ezetz!

ez daukat barkamenikan:  
arbola han dago baina  
basorik ez da Gernikan

ni gizon mutua naiz ta  
—hala haiz tamalez!

ni gizon mutua naiz ta  
ikasi nahi dut bertsoan  
—hori baietz!  
—hori baietz!

ikasi nahi dut bertsoan  
musu bat emango dizut  
hartzen banauzu besotan

ni gizon lotua naiz ta  
—hala haiz tamalez!  
ni gizon lotua naiz ta  
ez dut onartzen katerik  
—hori ezetz!  
—hori ezetz!  
ez dut onartzen katerik  
ez da sortu ni isildu  
nazakeen alkaterik

1995

Musika: Natxo de Felipe

---

# LA VACHE QUI RIT

batzuetan zizarea da  
zizare luze bat  
zelaiaren erdian buztan

bestetan satorra da  
sator jator bat  
lurraren barnetik mutur

zizare edo sator  
harrituta  
behatzen dio beti  
trenak  
behiari

—behi bat...!  
tristura kentzeko  
esne gaingabetua  
agintzen duen medikuak

—behi bat...!  
billeterik gabe  
ibiltzen den haurrak

—behi bat...!

natur zientzietako azterketak  
zuzentzen datorren irakasleak

esnetan dira treneko bidaiariak

behi bat

—dena buztan dena mutur—

ikusi dutelako

—behi bat...!

behi bat...!

behi bat...!

esnatu egin da gidaria

izutu egin da gidaria

behi bat?

berak ez du behirik harrapatu nahi!

—behi bat...!

behi bat...!

behi bat...!

gidariak ez du harrapatu nahi  
behirik:  
gero lasterka ibili beharko du  
amets gaiztoan  
geltokiz geltoki gelditu gabe  
zezenen aurretik

stop..!

stop...!

stop...!

topa  
egin du trenak  
bere buruarekin  
topo

zizarea bazen labur  
satorra bazen uzkur

eta oraindik ere  
harrituta  
behatzen dio  
trenak  
—dena burdin dena tutu—  
behiari  
—dena gordin dena titi—

nola egiten duen orduan  
behiak  
irri!

2003

---

# NIRE IBAIA

Nire ibaia ez dator itsasora  
nire ibaia ez da ibai  
inoizko ubidea  
kantari ez dakien erretena  
ur mehea dakar baina  
leporaino hartzen nau

nire ibaia ez dator itsasora  
nire ibaia ez da ibai  
erreka ahuspeztua  
izar bakarreko ispilua  
ez nau hezitzen baina  
busti egiten nau

nire ibaia ez dator itsasora  
nire ibaia ez da ibai  
ezin ditu bi bazter  
lizarririk gabeko errekaldea  
ez dakit nora baina  
eraman egiten nau

nire ibaia ez dator itsasora  
nire ibaia ez da ibai  
egarriaren lotsa  
hodei nekatu baten malura  
ez nau asetzen baina  
ito egiten nau

\* \* \*

nire ibaia ez dator itsasora  
nire ibaia ez da ibai  
bere buruaren txalupa  
itsaso izan nahi luke  
nire ibaia ez da ibai baina  
nire ibaia ez dator iturrira

1989

Musika: Imanol



---

# BASATZETAKO URRETXINDORRA

**b**ere buruaz lotsa zatar ez bestea  
arin ezkututzen da ikarak apoa  
somatzen baldin badu inoren pausoa  
gorrotagarri zaio ilargi betea

beldurtu egiten da apotxoa zinez  
harri baten azpian gorderik ardura  
edo baldarki jausiz sortu den putzura  
hanka egin behar du zu maita ezinez

apo, apo  
isilik hago!  
hire maite ederra  
lotan baitago

korroka honek izan nahi luke hitza  
maiteminez daudenen hasperen mingotsa  
apo lotsati hori neu nauzu bihotza  
maluros bizi naizen bufo vulgarisa

ilargitik mundura kantu bat tristerik  
zureganaino hegan ametsez hor doa  
ene kontra altxatzen baduzu orpoa  
xangrinez hilen nauzu zanpatu gaberik

apo, apo  
isilik hago!  
kantari ematen duk  
itsusiago

zatarra izatea omen da bekatu  
huts horrek egiten dit ariman zarrapo  
zu edertzeko baina sortu nintzen apo  
kantari nahi didazu orain debekatu?

badakit ez zarela zu horren doilorra  
nazka eman badizu nik daukadan antzak  
liluratuko zaitu ene kantu latzak  
ni naiz basatzetako ai urretxindorra

apo, apo  
isilik hago  
ene zapatapean...  
hi hilik hago!

1998

Musika: Joseba Tapia

---

# ZORAGARRIA EZ AL DA?

Agur lagun agur mundu  
agur ikusle samalda  
asmo zoro batek nakar  
ez zaitez tela asalda  
mundutik alde eginda  
mundua liteke alda  
zoragarria ez al da?  
bidegorrian aztalka!

haize kontra noa zuzen  
oker haizeak buruan  
aspertuko haiz lehenago  
lagun denek inguruan  
nire asmoak ez omen  
ez buru eta ez hanka  
zoragarria ez al da?  
bidegorrian aztalka!

oker haitez dut egina  
aspaldi gaitzeko meta  
meta hartara noa ni  
izan arren... Tourmaleta!  
bide lau samur berdina  
baino nahiago dut malda  
zoragarria ez al da  
bidegorrian aztalka?

ordokian ere beti  
nabilela malda gora  
badakit zaila dudala  
arribatzea inora  
baina ez dut zertan etsi  
zurekin eginen dut talka  
bidegorrian aztalka  
zoragarria ez al da?

trazatutako bidean  
gogait egiten dut guztiz  
noraezean naiz joaten  
arauak aldera utziz  
orduan zer ikusten da?  
buru bat eta bi hanka  
bidegorrian aztalka  
bidegorritik irtenda!

egunsentian aztalka  
arrastirian aztalka  
gau eta egun aztalka  
gelditu gabe aztalka  
buru bat eta bi hanka  
zoragarria ez al da?  
bidegorrian...!

haize barruan aztalka  
euri azpian aztalka  
elur gainean aztalka  
eguzkiraino aztalka  
buru bat eta bi hanka  
zoragarria ez al da?  
bidegorrian...!

biderik gabe aztalka  
gurpilik gabe aztalka  
galgarik gabe aztalka  
katerik gabe aztalka  
buru bat eta bi hanka  
zoragarria ez al da...?  
bidegorrian...!  
gorribidean...!

2005

Musika: Joseba Tapia

---

# PORTUKOPLAK

aitortzen dizut portua dela  
nire aberri bakarra  
aitortzen dizut portua dela  
nire aberri bakarra  
hantxe daukat nik lastre handian  
oroitzapenen gabarra

atako banda jo du txalupak  
umearen begipean  
atako banda jo du txalupak  
umearen begipean  
tanta gozo bat itsasorako  
hari agur egitean

ontzi guztiei diosala ta  
tristura bat bihotzean  
ontzi guztiei diosala ta  
tristura bat bihotzean  
izen arrotzek herdoil zauriak  
bidaia gaitzen ostean



baforearen tximinietan  
ez da izozten elurrik  
baforearen tximinietan  
ez da izozten elurrik  
portu batean jaioak ez du  
bide berrien beldurrik

letrak esaten ikasi nuen  
ontzi arrotzen branketan  
letrak esaten ikasi nuen  
ontzi arrotzen branketan  
izen gazien ozentasunak  
munduramina hanketan

txikotak largatzen zirelarik  
gaixotzen nintzen saudadez  
txikotak largatzen zirelarik  
gaixotzen nintzen saudadez  
faroen segak oraindik ere  
hil egiten nau gaudadez

draga handiak ezin du hustu  
itsas hondoko taberna  
draga handiak ezin du hustu

itsas hondoko taberna  
itoen loa hautsi du eta  
laster joko du galerna

munduak ongi daki naizela  
euskaldun seme jatorra  
munduak ongi daki naizela  
euskaldun seme jatorra  
Txipreko ontzi baten banderaz  
egina daukat atorra

zazpi bandera zazpi mintzaje  
nire aberri bakarra  
zazpi itsaso zazpi zohardi  
nire aberri nabarra  
portuak beti digu amore  
kaian urtzen da aparra

tristea baita gau ilunean  
baforearen tutua  
tristea baita gau ilunean  
baforearen tutua  
oroituz egin dizudan koplak  
tristuretan da gautua

1997

---

# ETA EGUNERO DUGU BEZPERA

**a**zkenak baitakar hurrena  
makurrak baitakar argia  
hurrenak baitakar beldurra  
hasteak baitakar zuzena  
zubiak baitakar larria  
urratsak baitakar mentura

helduko dela  
helduko dela  
eta egunero dugu bezpera

osoak baitakar erdia  
buruak baitakar zalantza  
beroak baitakar lausoa  
okerrak baitakar egia  
zalantzak baitakar arnasa  
barruak baitakar auzoa

helduko dela  
helduko dela  
eta egunero dugu bezpera

bihotzak baitakar ikara  
nekeak baitakar asmoa  
gordinak baitakar heldua  
ikarak baitakar itzala  
usteak baitakar harroa  
eskuak baitakar eskua

helduko dela  
helduko dela  
eta egunero dugu bezpera

2006

---

# APOAREN AMORRUA

Putzuz putzu nabilela  
amorruan puztuta  
dinostan igela  
amorruan puztuta  
patxadari naun aspaldion  
emana gibela

malko garratzenen ura  
dator ene putzura

jauzika zakinat oinez  
amorruan jauzika  
urrunaren minez  
amorruan jauzika  
pausoz pauso hobe nukeela  
ez nezaken sinets

malko zintzoenen ura  
dator ene putzura

zikina dinat aztarna  
amorruan zikina  
bideetan barna  
amorruan zikina  
ni ez bainaun lotsa sartzeko  
gorozetan hanka

malko garbienen ura  
dator ene putzura

gainezka dinat likina  
amorruan gainezka  
igelen higuina!  
amorruan gainezka  
izerditu gabe ez nagon  
ni libro egina

malko ederrenen ura  
dator ene putzura

apalik nabilen pozez  
amorruan apalik  
dinonat bihotzez

amorruan apalik  
munduak ni beharrago nain  
hi baino askozez

malko beroenen ura  
dator ene putzura

zakarra naun ni larruan  
amorruan zakarra  
azal 'ta barruan  
amorruan zakarra  
halere gozo ikasiko dun  
nirekin marruan

malko eztiennen ura  
dator ene putzura

korroka egin dinat hitz  
amorruan korroka  
zenbait mezu likits  
amorruan korroka  
ez ninake hain garbi egingo  
berbaduna banintz



malko gordeenen ura  
dator ene putzura

1998

Musika: Joseba Tapia

---

# TXORIA ZEGOEN KANTARI

txoria zegoen  
hosto artean moko  
txoria zegoen kantari  
harriak noiz joko

txoria zegoen  
moko betean txistu  
puntaren puntan  
txoria zegoen kantari  
harri bidean itsu

txoria zegoen  
txistu artean gozo  
adarraren puntan  
txoria zegoen kantari  
harriak noiz joko

txoria zegoen  
harri bidean itsu  
zuhaitzaren adarrean  
txoria zegoen kantari  
kontu zaharren berritsu

txoria zegoen  
harriak noiz joko  
aldapeko zuhaitzean  
txoria zegoen kantari  
adarrik gabeko hosto

txoria zegoen  
puntaren puntan  
adarraren puntan  
aldapeko zuhaitzean  
txoria zegoen kantari  
hosto artean moko

orduan sortu zen  
hosto artean  
moko betean  
txistu artean  
harri bidean

sagarra:

harriak hura zuen jo

txoriak guri

ziezagun jo

...

(horixe!)

2004

---

# ZUEK EZ DAKIZUE

Zuek ez dakizue zer den  
gauero kalenderaren numero bat tatxatzea  
eta ilun-jarioari  
tiro ezin emana

zuek ez dakizue zer den  
norbaitek igurikiko digula  
sinetsi nahi izatea

zuek ez dakizue zer den  
gizonaren negarra  
ilunabarra kopetari atxikitzen zaionean

zuek ez dakizue zer den  
euria

zuek ez dakizue zer den  
bakarrik egotea  
bakarrik  
bakardaderik ere gabe

zuek ez dakizue zer den  
ezer

zuek ez dakizue ezer

1976

Musika: Joxe Portela

---

# ZORIONTASUNA HERRI BAKARREAN

Ez ezazuela ezetz esan  
oraindik badago mundu honetan  
zapaldu gabeko uharte bat  
inor ez da handik itzuli hori da froga  
gure zain zabal etzana  
urrun

suntsimenduaren minenean  
eta garaitzaren zoroenean ere  
ez ezazuela ezetz esan  
nork ez du amets debekatua egin  
borrokatu behar honetarik  
urrun

naufragiorik zinikoena antolatuko dugu  
Cromagnongo bizkaitarrak bezain  
zorientsu bizi ahal izateko  
ez ezazuela ezetz esan  
aberri guztiez biluzik  
urrun

eta noizbait lanbroaren erdian  
azalduko zaigu anker  
uharte urrunenaren bila datorren ontzia  
aberri bat daukagula erakusteko  
ez ezazuela ezetz esan  
hurren

1997



---

# LOIOLAKO PORRUSALDA

Azpeitiko mutila  
Inazio donea  
zenbait atso gazteri  
jasoa gonea  
ai zer gonorrea  
Inazio donea

herriaren lepotik  
mila marabedi  
Loiolatarren kasta  
madarika bedi  
besteren izerdi  
mila marabedi

Oinaztarren mutila  
han aurrean doa  
Gaztelaren pausoan  
oina ta zangoa  
ederra mandoa  
han aurrean doa

Iruñan hartu zuen  
zangoko herrena  
Nafarroa salduta  
etsaia barrena  
ez du okerrena  
zangoko herrena

begira nola doan  
aldarera herren  
apostoluetatik  
jarria da hurren  
Infernuko Txerren  
aldarera herren

orduan sortu zuen  
Jaunaren armada  
munduko gerra zikin  
guztien ama da  
inon beltzik bada  
Jaunaren armada

Jainkoaren aldeko  
beso armatua  
dolarrak aspaldian

ongi xarmatua  
ustel xamartua  
beso armatua

Loiolan ageri da  
eder basilika  
zeruko zergazainek  
sakela kilika  
Kristo zintzilika  
eder basilika

hizketa leuna du  
Kristoren morroiak  
sotanak beltzak baina  
zuriak sermoiak  
Loiolan zer lohiak  
Kristoren morroiak

Urolako lohietan  
kli-klu kli-klu kli-klu  
horra santu batenak  
gaur zenbait meritu  
Inaziok baditu  
beste hainbat kli-klu

1998

Musika: Joseba Tapia

---

# BOLUETA-SESTAO 06.13

hurrengo geltokia...

Piccadilly Circus!

hurrengo geltokia...

Újpest-Városkapu!

hurrengo geltokia...

Alto dos Moinhos!

hurrengo geltokia...

Bronx!

hurrengo geltokia...

Otemachi-Nihombachi!

hurrengo geltokia...

hurrengo geltokian

jaitsiko naiz

agian

galtoki egokian

hurrengo geltokia...

Arco di Travertino!

hurrengo geltokia...

Nádra(omega)í Hole<sup>1</sup>/<sub>4</sub>ovice!

hurrengo geltokia...

Alexanderplatz!

hurrengo geltokia...

Rivadavia y Larrea!

hurrengo geltokia...

Komsomólskaya koltsevaya!

hurrengo geltokia...

hurrengo geltokian

jaitsiko naiz

agian

galtoki egokian

hurrengo geltokia...

Passeig de Gracia!

hurrengo geltokia...

Ethniki Amyna!

hurrengo geltokia...

Place de la Bastille!

hurrengo geltokia...

Forskningsparken!

hurrengo geltokia...

Chapultepec!

hurrengo geltokia...

hurrengo geltokian  
jaitsiko naiz  
agian  
galtoki egokian  
mundu erdiaren jabe  
jaitsiko naiz  
agian  
ipurdia altxatu gabe

2004

---

# WILLIAM DRURYREN BALADA

**b**alada bat kantatzen behar dut nik hasi  
Tidworth-eko kartzelan zer nuen ikusi  
enkargatu zidana orai ez da bizi  
aztia zelakoan zuten errarazi

Inglaterra handia itsasoaz harat  
leku makurragorik munduan ez da bat  
musikariak ditu hartzen matxinotzat  
nor ibili da jotzen eskusoinua bart?

William Drury daukat nik ponteko grazia  
mundura sortu eta Irlandan hazia  
eskusoinua jotzen umetan hasia  
makina bat herreni dantza arazia

Lord Hamilton jauna da buruz iletxuri  
epaia emateko ez dago urduri  
hauspoa kendu eta giltzapera Drury  
soinularia zuten soinu gabe utzi



non jo ez neukan eta hotzak atzamarrak  
lasto gainean lagun nituen kaparrak  
ez du giro izaiten hantxe irlandarrak  
dorrean jo zituen ezkilak hamarrak

hamarrak jo orduko soinuak zuen jo  
Druryk bezperan baino askoz ederrago  
gaua pasa genuen kantu eta txalo  
ingles haiek ordea nagi dantzarako

Tidworth-en denek zuten erraiten ai ene  
Lord Hamiltonek eta Lady zaharrak ere  
soinua omen zela soinuen errule  
ene hauspo ttipia plazan zuten erre

musikarik gabeko gaua da tristea  
zailago dute orai begiak ixtea  
sorginduak daudela dator albistea  
han ere bazeukaten horren sinistea

hauspoa suntsituak bere pena zor du  
uste dut betirako zaretela gortu  
moztasun triste honen erantzuna nork du?  
nik ez dut ezer sortzen soinuak nau sortu

bakea nahi zenuten soinu hori errez  
Tidworth-en egiten da justizia errez  
maluren eztigarri musika da berez  
lo eginen duzue baina ametsik ez

Lord Hamiltonek zeukan bihotzari esker  
soinularia sutan dantzatu zen laster  
aztia zelakoa ez zegoen oker  
Druryk apo txipi bat egin zuen poker

Tidworth-eko herria zer herri isila  
mutua dago beti dorreko ezkila  
soinuak bereizten du bizia ta hila  
inglesak ikaratzen Drury zen mutila

1998

Musika: Joseba Tapia

---

# IXO!

**b**a euria ari zuela  
eta galduak ginela galduak ginela mendian  
—hotz!—

beldurgarria zen gaua  
—beltz!—

eta horra orain ipuin barregarria:

erantzi nuen larruazala  
kremaileran irekiz lepotik behera  
—tximist!—

eta harekin egin nizun oihal-txabola bat  
ez zintezen busti

atera nuen bihotza eta gora nuen jaurti  
bengala berde bat zen ahapetik oihuka:

ixo! ixo! ixo!  
alaba daukat lo!

atzamarrak eten

eta txotxetan txikitu nituen

—otx!—

su handi bat pizteko neure ahoan

orduan heldu zen otsoa

—isil!—

eta mendiko ardiak jan zituen

ezkilak eta guzti

ixo! ixo! ixo!

alaba daukat lo!

1988

---

# HAMALAU URTE

Īgandeetako asperdura...  
zenbat arratsalde!  
baforeek uhinek denek  
zioskuten:

alde!

alde!

alde!

arratsaldeko tristura  
igandez igande...  
ontzia badoa farolapean  
hantxe gu arrantzale  
hogeï braza beherago  
arrainek...

barre!

barre!

barre!

baina itsas-lamiek  
—a, itsas-lamiek!—  
haiek bai gintuztela  
maite...

ezkatzaz eginak geunden  
burutik oinetaraino

2005

---

# HAN

han  
zure mundua ez da erresuma hartakoa  
han  
non ahanzi egiten den non ahanzi ezin den  
non itsasoa margotu egiten den  
non bakarrik egoten den  
non bakarrik ezin egoten ahal den  
non katuak diren libre non hil egiten den  
non adiskideak non hitzak non maitasunik non  
non loa eta ametsa ez diren bat  
non ikasi egiten den non idatzi egiten den  
han  
non non zaudeten badakizuen  
non poetak ez dauden preso Rimbaudi tiro  
emateagatik  
non atek ixteko diren non bisitak ametitzen  
dituzten  
non harresiak zikoinek iragaiten dituzten  
non mutu ez non damutu ez  
non baina non beti non eustea bera den haustea  
non ihes egitea ez den ihes egitea

non duintasuna zigorreen neurtzen den  
non kilometroak non mehatxuak non noiz  
non jipoituak non hala ere  
non errotek urik behar ez duten  
non nik diodan  
han  
non han zaudetenak gu zareten  
non gu ez gauden  
han  
non zuk diozun hemen  
han  
non zuk diozun ni ez naiz hemengoa

1989

Musika: Fermin Iraola eta Dani Ulazia



---

# ERBIEN OMENALDIA

## MATEO SOINURI

**m**eza kantari  
aintza Jaunari  
Mateo zintzo lanean ari  
zaunka entzunda  
—Fusila nun da!  
abiatzen da erbi ehiztari

Mateo Txistu  
ez da obispu  
badaki hartzen zenbait arrisku  
ehizatu orde  
erbia gorde  
askatasunak behar anitz du

zaunka eta galde  
dena debalde  
ehizak egin baitie alde  
zakurrek dute  
inondik uste  
Mateo dela erbien alde

inoiz Carmonan  
gero Zamoran  
gizona txehetzen duen errotan  
Mateo apaiz  
erbitarra haiz  
ez haute asko maite Erroman

erbiak badu  
izter 'ta larru  
Mateok ere zerbait behar du  
Trentoren aurka  
sotana urka  
guraso berri urtea barru

herria zertan  
Mateo bertan  
ikasi berri duen mezetan  
inoiz Laus Deo  
sarri ateo  
mezetan baino hobe lezetan

gure hauspoa  
bada nork joa

ez badizute mozten besoa  
maite zaitugu  
Mateo Soinu  
aitasantua'n seme gaiztoa

1999

---

# AZKEN HONDOKO TABERNAN

**A**zken hondoko tabernan edaten dut  
azkenondokoak garela dakienaren soseguz  
suntsituen hezurak berbatzen diren artean  
inperioaren aurka poesia baliatu behar dugula  
uste duten nire antzeko inozoak bilatzen ditut

joanean datorren amorante ukatua naiz  
saritzat emandako maitasuna ez da maitasuna  
ez nuke ostrukatu nahi ardo amniotiko batean  
eta poesia gure borroka bera denik  
uste ez duten nire antzeko inozoak bilatzen ditut

preso makilatuak zuhaitza salatzen duen bezala  
erakusten du zauriak geziaren gramatika  
baina sakrifizioak ez du Jainkoa frogatzen  
martiri batzuk beren fedea baino ederragoak direla  
uste duten nire antzeko inozoak bilatzen ditut

autokritika eskatzen dut ez oinazearen mistika  
ahularen kemenak urrikia sor badezake ere  
jokamolde duin baten ordain datza erdi bi egina bou  
zaharra

munduak gu ez maitatzeko eskubidea duela  
uste duten nire antzeko inozoak bilatzen ditut

hezurrari grina erantsi nahi dion inozoa naiz  
akelarrea antolatuko nuke Gernika erraustu berrian  
euskaldunek hondoratu duten euskalduna naiz  
sasiko amoranteen hilerri honek beste alderik ez  
duela

uste duten nire antzeko inozoak bilatzen ditut

ez iezadazue galde nola iritsi nintzen hona  
haginka utzi ninduten liburuek haragirik gabe  
odolaz idatzi behar nuen azken esaldi hura  
asmatu baino lehen geure buruaz besterik ezin  
dugula

uste duten nire antzeko inozoak bilatzen ditut

nire antzeko inozoak bilatzen ditut  
azken ondotik lehentasun berri bat sortuta  
uhin egin ahal izateko errealitatera

poesiak bakarrik salba dezake Berlin  
Berlinek bakarrik salba nazake ni

1997

Musika: Jexuxmai Lopetegi

---

# LAGUN GALDUAREN GEOGRAFIA

Andoni eraman zutenez gero  
ez dut ikusi nahi Zarautz  
hondartza basamortu ez ote  
euri gozoena errauts

Andoni eraman zutenez gero  
ez dut maite Atharratze  
bortua koplak xirula dena  
dena egiten zait atze

Andoni eraman zutenez gero  
zertan bisita Gatika  
kafe gazitan urtua dago  
euskararen gramatika

Andoni eraman zutenez gero  
mingarri zait Miarritze  
buruan mailuka zazpi mailu  
oinetan zazpina iltze

Andoni eraman zutenez gero  
ez dut bidean Dulantzi  
lagunik gabe naizelako zait  
oinez egiten ahantzi

Andoni eraman zutenez gero  
ez dakit non den Bidarra  
laguna galdu duen harentzat  
bideak alferrik darrai

Andoni eraman zutenez gero  
mapan puntu bat Zangotza  
beti daukat aitzakiaren bat  
beroa ez bada hotza

Andoni eraman zutenez gero  
nork benedika Garazi  
munduko plaza guztiak ditu  
zulo batek iragazi

Andoni eraman zutenez gero  
gorroto dut Donostia  
nekez higatuko dut nik hango  
espaloietan oskia



Andoni eraman zutenez gero  
hor dago nonbait Iruña  
sutara bota nuen haserre  
printze onaren ipuina

Andoni eraman zutenez gero  
ederrez da zatar Bilbao  
hango mahastiek ez dakarte nik  
behar dudan beste ardao

Andoni eraman zutenez gero  
ez dut nik behar Baiona  
hosto bat kendu zaion hitzari  
dena da kendu zaiona

Andoni eraman zutenez gero  
ez aipa ez aipa Gasteiz  
ukatuok hautatuengandik  
beti bizi gara bereiz

Andoni eraman zutenez gero  
ez dut berriro jo Maule  
Andoni eraman zutenez gero  
biok bahituta gaude

2003

Musika: Joseba Tapia

---

# BUFO BUFOREN KORROKA

**M**aitasunaren arlote  
igelek hala diote  
mihi gaiztoek naute bihurtu  
apo nintzena apote

bele samaldak artotan  
gezurra dabil ahotan  
akelarrean ari nintzela  
serorarekin apotan

ba omen daukat pozoina  
berotzen duena soina  
apoa lehertu nahirik jaso du  
epaileak bere oina

beltza da gaur gauerdia  
sarobean da ardia  
torturatuak salatu du nik  
jan dudala ilargia

ederrak dira egiak  
apoen apokeriak:  
nik janen ditut nik janen ditut  
Pierre de Lancreren begiak

euriak ezponda busti  
apoak egin du jauzi  
maiteminduen musikak gozo  
isiltasuna du hautsi

mendian sendo arroka  
behorra zuzen labroka  
William Drury hil zenuten baina  
ez da isildu korroka

1998

Musika: Joseba Tapia

---

# NON DAGO BASQUES' HARBOUR

**N**on dago Basque's Harbour  
galdetzen badut  
ez da mapa bat ekar diezadazun

non dago Basque's Harbour  
galdetzen badut  
ez da galdu egin naizelako

non dago Basque's Harbour  
galdetzen badut  
ez nabil portu bila

non dago Basque's Harbour  
galdetzen badut  
zinez mintzo naiz baina

non dago Basque's Harbour  
galdetzen badut  
ez dut erantzunik behar

non dago Basque's Harbour  
galdetzen badut  
ez baitut galdera bat egiten  
galdetzen badut  
non dago Basque's Harbour  
non dago Basque's Harbour

1997

---

# ETORBIDE PROFESIONALA

Zenbat trikiti zenbat fandango  
zenbat pasodoble jo dudan nik  
ezker eta eskuin esku eta zango!  
zer ez dut nik jo?  
txaloak gaiztotzen du harroa  
baina sekula ez dut jo  
ez dut jo sekula jotakoa

mila mandio mila teilape  
mila taberna alaitu ditut  
bete eta hutsik hutsik egin gabe!  
non ez dut nik jo?  
zoko guztietan jo dizut nik  
baina sekula ez dut jo  
ez dut jo sekula pulpitutik

jotzen dut uda jotzen dut negu  
egunero naiz jo beharrean  
soinuak estu ninduen heldu  
noiz ez dut nik jo?  
giro sortzen zenbat ibilera  
baina sekula ez dut jo  
ez dut jo sekula epelera

zenbat trikiti zenbat fandango  
zenbat folk eder joko dudan nik  
zenbat egia eta gezur esango!  
nola ez dut joko?  
joko dut zoli joko dut grabe  
baina inoiz ez dut joko  
ez dut joko inoiz jotze alde

ezintasunak joko nau baina  
orduan ere joko dut bero  
saiatuko naiz tentatuz gero  
nola ez dut joko?  
dardara batean naiz jarriko  
baina inoiz ez dut joko  
ez dut joko inoiz belauniko



joko dut karu joko dut merke  
eta ez daukanak behar banindu  
joko dut pozik, pozik musu eske  
nola ez dut joko?  
joko dut hauspoak eman arte  
baina inoiz ez dut joko  
ez dut joko inoiz maite ez banaute

2005

Joseba Tapiarekin idatzia

Musika: Joseba Tapia

---

# HARK

**b**eldurtuko gaitu hezurrez hezur  
lotsa ez gaitezen  
elkar biluz dezagun urtzeraino

urtuko gaitu bihurrez bihur  
lotsa ez gaitezen  
elkar uler dezagun biluzteraino

biluziko gaitu beldurrez beldur  
lotsa ez gaitezen  
elkar bihur dezagun ulertzeraino

apurtuko gaitu zuhurrez zuhur  
lotsa ez gaitezen  
elkar makur dezagun hurbiltzeraino

hurbilduko gaitu gezurrez gezur  
lotsa ez gaitezen  
elkar apur dezagun zuhurtzeraino

urrunduko gaitu malurez malur  
beldur ez gaitezen  
elkar maita dezagun lotsatzeraino

1997

Musika: Francisco Garcia Alvarez

---

# KONTZIENTZIAREN HARTZEA

Eastbourne ez dago Irlandan  
eta faro ingeles bat izan litekeen bezain burgesa da  
Eastbourneko faroa  
ez du haren beharrik izanen gure ontziak  
baina hala ere kantu bat merezi du  
Eastbourneko faroak  
haren oinarrian jotzen dutenak  
errautsezko olatuak dira

Eastbourne ez dago Galesen  
eta Engels ingeles bat izan litekeen bezain burgesa  
zen  
Friedrich Engels  
faro batek adina baizik ez zuen ikasi itsasoaz  
baina hala ere kantu bat merezi du  
Friedrich Engelsek  
Eastbourneko faroan jotzen dutenak  
haren errautsak dira

Eatsbourne ez dago Eskozian  
eta itsaso ingeles bat izan litekeen bezain burgesa  
da

Eastbourneko itsasoa  
mendebalak ez daki harrotzen bare da beti hemen  
baina hala ere kantu bat merezi du  
Eastbourneko itsasoak  
hemen jotzen duten errautsak  
Engelsen manifestua dira

Eastbourne ez dago Britainian  
eta olatu ingelesak izan litezkeen bezain burgesak  
dira

Eastbourneko olatuak  
menturaz ez dute faroa inoiz suntsituko  
baina hala ere kantu bat merezi dute  
Eastbourneko olatuek  
etengabean jotzen dute  
Engelsen errautsak balira bezala

Eastbourne ez dago Euskal Herrian  
eta errauts ingelesak izan litezkeen bezain burgesak  
dira

Eastbourneko errautsak

ez dira inoiz berriro sutuko faro egitearren  
baina hala ere kantu bat merezi dute  
Eastbourneko errautsek  
olatutan antolatu dira  
itsaso bat direla balekite bezala

1997

---

# ENE SOEK

Ene soek

beti

amets berbera

biltzen dute

bihotz-zakuan

ene soek

beti

forma berbera

laztantzen dute

ametsezko hitzetan

ene soek

beti

hutsune berbera

fusilatzen dute

ametsaren kontra

1974

Musika: Peio Serbielle

---

# WAFÁ

*Wafa Idris in memoriam*

Oliba mikatza izanda  
nahi zenuke gozoan  
gozotasun horregatik  
maite zaitut osoan

kufiya lepoan  
horra zein gazte doan  
Wafa! Wafa! Wafa! Wafa!  
sua bihotzondoan

kufiya lepoan  
horra zein heldu doan  
Wafa! Wafa! Wafa! Wafa!  
sua bihotzondoan

pikondo errea izanda  
nahi zenuke hostoan  
hostotasun horregatik  
maite zaitut osoan



kufiya lepoan  
horra zein astun doan  
Wafa! Wafa! Wafa! Wafa!  
sua bihotzondoan

kufiya lepoan  
horra zein arin doan  
Wafa! Wafa! Wafa! Wafa!  
sua bihotzondoan

mahasti zapaldua izanda  
nahi zenuke mulkoan  
harrotasun horregatik  
maite zaitut osoan

kufiya lepoan  
horra zein apal doan  
Wafa! Wafa! Wafa! Wafa!  
sua bihotzondoan

kufiya lepoan  
horra zein harro doan  
Wafa! Wafa! Wafa! Wafa!  
sua bihotzondoan

etxe apurtua izanda  
zutik zaude ukoan  
osotasun horregatik  
maite zaitut osoan

kufiya lepoan  
horra zein lerdan doan  
Palestina! Palestina!  
sua bihotzondoan

kantuz naramala  
hautsia du hegala  
Palestina! Palestina!  
erdiminez Ramallah

2002

Musika: Joseba Tapia

---

# MENDEKUA

Elurra ezagutu ez duen teilatua  
izarrek greba egin duten gaua  
arbela beltza dela  
umearen aurrean!

—ireki begiak!

arbela beltza dela  
umearen aurrean!  
ezkutatzeko balio ez duen leizea  
biderik gabeko makadam puska

—hartu klariona!

tximista berde bat  
atzo  
osabaneko bide bazterrean

—ez dakizu?

ispilu itsua  
umearen aurrean  
hor ezin ditu ikusi  
bere hatzak botoien gainean

muskerra zen  
osabaneko bide bazterrean!  
alderik alde  
muskerra da  
arbelaren hutsean...

—etorri hona!

muskerra  
arbelaren hutsean  
alderik alde  
tximista berde  
ilunpeko botoiak sakatzen  
do

re

fa

la

lau-pataka  
do

fa

la

re

tximista berde  
maisua aditzen ez duen  
porrusalda

zure hipotenus  
eta Napoleon!  
nik ere ikasiko dut  
nik ere ikasiko dut  
jotzen!

egon  
egon...!

2004

---

AMERIKAREN KONKISTA  
EZINEZKOA GERTATZEN  
BADA ERE  
KONTSOLAGARRI

Alcatrazko ziega berdetik  
ez da itsasoa ikusten  
ito behar duenak hau du  
itsasoaren hurren

Alcatrazko ziega berdeak  
leihorik ez baitauka  
kondenatuaren ihesa  
beti da hondorantza

Alcatrazko ziega berdean  
aulki bat ez besterik  
borreroaren bihotz ona  
frutaz dago beterik

Alcatrazko ziega berdean  
ume batek nahi du hil  
almendra mikatzak usnatuz  
itsas ordeko lurrin

Alcatrazko ziega berdean  
umea lainoz laino  
euri azido batek dakar  
kantua ontziraino

Alcatrazen aspaldi zuten  
kartzela itxi baina  
han daukagu beti zabalik  
ziega huts berde bana

1997

---

# NIRE EUSKALTASUNA

**N**ire euskaltasuna baso bat da  
eta ez du zuhaitz genealogikorik

nire euskaltasuna dorre bat da  
eta ez du Alostorrerik

nire euskaltasuna bide bat da  
eta ez du zaldizkorik

nire euskaltasuna lore bat da  
eta ez du aldarerik

nire euskaltasuna itsaso bat da  
eta ez du almiranterik

nire euskaltasuna liburu bat da  
eta ez du sotanarik

nire euskaltasuna mundu bat da  
eta ez du Amerikarik



nire euskaltasuna bertso bat da  
eta ez du txapelik

nire euskaltasuna bekatu bat da  
eta ez du mea-culparik

1986

Musika: Imanol

---

# LANGUE ET CIVILISATION FRANÇAISES

Zubirik ederrenak ura du egarri  
Paris aileza Senak laztan harriz harri

entzun ezazu Villon zer dioskun urak  
biltzen direa inon inoizko elurrak?

Robespierrek lepotik isuri du Sena  
itsaso da geroztik ibai izan zena

geroak izanari hartuko dio gain  
elurrak biltzen dira maitasunaren zain

zubipetik bagoaz Komunako hilak  
uraren abaroaz maitale sotilak

belaunetaraino da Sena odolarri  
zubirik ederrenak hura du egarri

---

# TEILATUKO LIZARRA

h  
orra etxe honen armarria  
noblea noblerik bada  
nekez ihartuko den garra  
teilatuan du jarria  
teilatuan du jarria  
lizar abarra

arratsaldean dute ekarri  
oihanetik karrikara  
hosto txikien ikara  
teilatuan da kantari  
teilatuan da kantari  
lizar abarra

gaur eginen dute bizkar-besta  
ez da ohitura zabarra  
biba langile zaharra  
teilatuan da ameska  
teilatuan da ameska  
lizar abarra

etxe hau ezin liteke lotu  
eten egin du amarra  
badaki non den iparra  
teilatuan du pilotu  
teilatuan du pilotu  
lizar abarra

badoa ontzi piraten artera  
utzirik lehor zatarra  
nork hautsi horren oldarra  
teilatuan du bandera  
teilatuan du bandera  
lizar abarra

ez bedi gal inoizkotan  
etxe berrian lizarra  
umetzen nauen zirrara  
teilatuan dut hostotan  
teilatuan dut hostotan  
amets abarra

---

# KATU HAUNDIXA

Gauaren katu haundixa datorrenean  
nik defendatuko zaitut  
begixak atera nahi badizkizu  
maite nauzun ala ez galdetu gabe  
defendatuko zaitut nik

eta gauaren katu haundixaren atzetik  
zakur amorratuak baldin badatoz  
zure bila  
nik defendatuko zaitut  
atera irtenen natzaie ez dezaten amil  
eskuok jaurtikiko dizkiet zaunka ez egiteko  
hezurrotan dezaten gosea berdin

maite nauzun ala ez nauzun  
defendatu egingen zaitut

ez zaitzaten iratzar zu hemen

ala ez nauzun maite

zure begixen lumek  
osatuko naute

1989

---

# AGIRRETARREN BANDERA

Agirretarren bandera  
hartu zuten hankapera  
gure ametsak bota zituzten  
errekan behera  
ikusirikan galera  
askok egin zuten atzera  
ezin omen da poza ekarri  
minduen aldera

herdoildu zen igitaia  
paretan zegoen laia  
nonahi eta beti lanturu bera  
hilen kanpaia  
agirretarrak du gaia  
iratzar dadin garaia  
harro sutzen da guk bihotzean  
daukagun ardaia

agirretarrak zer garen  
esango dut hirugarren  
zutik irauten saiatzen gara  
erori arren  
ez bagabiltza azkarren  
ez da gaudelako herren  
munduko zoro guztiak gara  
lagunak elkarren

agirretarren bandera  
fusilatuen kantera  
gure asmoak oraindik dauka  
zaila tankera  
goitik doa hegabera  
basa-izarren artera  
derrotatuak ez du bildu nahi  
inoren mendera

\* \* \*

Araotzeko agote  
urre-goseko arlote  
bizio zikin guztien fama  
egin diote



ez dakienik ba ote  
agirretarra zen Lope  
librotasuna ukatzen zuten  
erregeen traidore

badakit agirretarrak  
eta antzeko belarrak  
laster garela mundu hontatik  
jorra beharrak  
librotasunaren garrak  
sortu ohi ditu negarrak  
horiek denak dirade gure  
labeko kedarrak

1995

Musika: Bixente Martinez

---

# LAFAYETTEREN KOPLAK

Hernan Cortes gaur lotua dago  
portu erdiko buietan

Hernan Cortes gaur lotua dago  
portu erdiko buietan  
inperioaren oroimena du  
harrotzen masta goietan

alarma joko du zentinelak  
—Etsaia dator abaoor!

alarma joko du zentinelak  
—Etsaia dator abaoor!  
gerlaontzi bat umeak baitu  
itsasoratu jostakor

gure ontzira egin dute su  
haren zazpi kanoi beltzek  
gure ontzira egin dute su  
haren zazpi kanoi beltzek  
kanoiek baino gehiago naute  
beldurtzen nire ametsek

erraz mozten du gure papera  
Hernan Cortesen ezpatak  
herraz mozten du gure papera  
Hernan Cortesen ezpatak  
nire ontziaren puskak ziren  
arrain berrien ezkatak

nire portuak herria zuen  
kaietan egin langile  
nire herria portuak zuen  
kaietan egin langile  
grebara deika dabil haizea  
bandera denen garaile

haizeak Txileko fosfatoa  
zakar sartzen du begian  
haizeak Txileko fosfatoa  
zakar sartzen du begian  
isil-batzarra dute peoiek  
hirugarren biltegian

alferrik dute jaurti ontzitik  
amarratzeko txikota  
alferrik dute jaurti ontzitik

amarratzeko txikota  
aho batean erabaki da  
Hernan Cortesi boikota

ederra baita elkartasunak  
ematen duen ikara  
ederra baita elkartasunak  
ematen duen ikara  
gure portutik abiatu zen  
Lafayette Amerikara

nire herriko gazteak doaz  
portutik mundu osora  
nire herriko gazteak doaz  
portutik mundu osora  
Lafayette berriz txalupa bete  
gauero da itsasora

---

# REAL POLITIK

Entzun ezazu kontzejal jauna edo anderea  
badakizu dakizunez  
nazkatu gara ogi lizunez  
ez dugu nahi gosaldu albiste ilunez  
gure plazan gauero eguzki betea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen borroka lurrina  
lepokoan zeukan ikurriña

entzun ezazu alkate jauna edo anderea  
presa berririk ez arren  
ederto goaz azkengarren  
ez zaigu ardura berandutu arren  
bareari berea, hori da legea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen aberri lurrina  
balkoian zeukan ikurriña

entzun ezazu sailburu jauna edo anderea  
ez dugu maite ardaila  
bihar joko dugu bataila  
Goliatek proba dezan Daviden habaila  
handiak txikitzea da gure xedea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen ikara lurrina  
paparrean zeukan ikurriña

entzun ezazu lehendakari jauna edo anderea  
herriak zuri emana  
ez baita nolanhiko zama  
hartzan dituzun lanak ditzagula bana  
zuretzako botoa guri boterea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen haserre lurrina  
bihotzean zeukan ikurriña

entzun ezazu jaungoiko jauna edo anderea  
zugana gatoz itsuan  
mundu triste honen izuan  
zenbatean etxeak hor paradisuan?  
zure artaldekoa da euskal aberea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen gezurren lurrina  
hodeietan zeukan ikurriña

entzun ezazu deabru jauna edo anderea  
gozamenaren azkura  
aspaldi zeharo galdu da

hemen behar dena da zure diktadura  
parrilan erretzeko kristoren jendea!

berak ezin zuen ezer egin  
ez zen bere eskumenekoa  
baina ados zegoen gurekin  
doan eman zigun bost... ekoa!  
ederra zen porroten lurrina  
errautsetan zeukan ikurriña

2005

Musika: Joseba Tapia



---

# PUTZU GUZTIEK DUTE HONDOAN APOA

Parisko jauregiek behar dute Sena  
Versallesko putzuek bezala apoa  
Komunako iraultzan gorri izan zena  
okerka dabil orain herren du zangoa

Luisianako lurretan dator Mississippi  
ibai hori begitik sortu du apoak  
zuri ez delako ta badelako ttipi  
Kukluxklanen bisita dauka gizajoak

Kazan hiritik zabal pasatzen da Volga  
popeak agurtu du ostikoz apoa  
kosako zuri denak daitezela olga  
pikutara joan da sobieten aroa

ai mundua betea ez balego apoz  
nork emanen lioke bizitza honi poz?  
penak uxatzen ditut eskusoinua joz  
nahiago baitut bizi ahuspez baino hauspoz!

Lisboako zubiak edertzen du Tejo  
Pessoa lagun zaharra bildu du apoak  
tabernara kantari zabuka dute jo  
poetarik onena ontzen du ardoak

London aberasteko dago Tamesia  
ate denetan jo du lan-eske apoak  
Robin Hoodek aspaldi hautsi du gezia  
orain beste beso bat behar du arkoak

Al Kairo zikin hartan isurtzen da Nilo  
Alaren urrikia otoi du apoak  
pobre sortu den horrek inon ez du giro  
bihar lehertuko ahal du Aliren autoak

ai mundua betea ez balego apoz  
nork emanen lioke bizitza honi poz?  
penak uxatzen ditut eskusoinua joz  
nahiago baitut bizi ahuspez baino hauspoz!

Buenos Airesen bada Rio de la Plata  
bazter hartatik dago oihuka apoa  
ura badauka baina zilarra du falta  
Piazzolak bezain triste jotzen du tangoa

Baionan itsasora zabalik Aturri  
hemen ere bizitzen lan dauka apoak  
egalitatez labor libertatez urri  
ez baitira zilegi hark dauzkan asmoak

Amazonas Danubio Ganges Po Zanbezen  
mundutxo hau denean oso txarto doa  
baina ez dezagun gal esperantza ezen  
putzu guztiek dute hondoan apoa

ai mundua betea ez balego apoz  
nork emanen lioke bizitza honi poz?  
penak uxatzen ditut eskusoinua joz  
nahiago baitut bizi ahuspez baino hauspoz!

1998

Musika: Joseba Tapia

---

# ARITMETIKA ARAZOAK

Zenbat lurralde ditu  
gaur Euskal Herriak?  
Euskadik adina bai  
balitu erdiak!

zenbat euskaldun ditu  
gaur Euskal Herriak?  
ez lirateke gutxi  
balitu erdiak!

zenbat aditu ditu  
gaur Euskal Herriak?  
ez ote luke hobe  
balitu erdiak?

zenbat aurkari ditu  
gaur Euskal Herriak?  
herritarreko bosna  
balitu erdiak!

zenbat maitale ditu  
gaur Euskal Herriak?  
erruz maitatu izan  
balitu erdiak!

zenbat bekatu ditu  
gaur Euskal Herriak?  
ez luke barkamenik  
balitu erdiak!

zenbat gobernu ditu  
gaur Euskal Herriak?  
behar baino gehiago  
balitu erdiak!

zenbat arazo ditu  
gaur Euskal Herriak?  
asko samar oraindik  
balitu erdiak!

zenbat galdera ditu  
gaur Euskal Herriak?  
nahiago nuke bihar  
balitu erdiak!

zenbat erantzun ditu  
gaur Euskal Herriak?  
ai hobeki pentsatu  
balitu erdiak!

2002

Musika: Joseba Tapia

---

# NEURE ESKUA

**N**eure eskua  
beste esku batetan grapaturik  
izerdi bakarra jaso dezan  
ala  
surtarako dut

neure besoa  
bizkar bat ingura dezan  
ala  
erauzteko

neure ahoa  
egiari hegoa zabal diezaion  
ala  
adreiluz tapiatzeko

neure begiak  
(denok espero dugun) egunaren ilunabarrean  
negar egin dezaten  
ala  
gauak eramateko

neure bularra  
zure ametsaren burua deskantsa dadin  
ala  
etsipen keak itotzeko

neure bihotza  
badakizu  
zuretzat  
eta  
denentzat

1974



---

# MASUSTA GORRI GARRATZA

Zorioneko egun batez  
txipia nintzen aroan  
bazkalondoko beroan  
zorioneko egun batez  
umearen aspertua  
izebaren lo-kuluxka  
zer deskubritu ote nuen  
zorioneko egun batez?  
sasi artean masusta!

masusta gorri garratza...

zorioneko urte batez  
esnatu nintzen mutiko  
galdua nintzen betiko  
zorioneko urte batez  
gauero nuen gogoan  
sasi arteko masusta  
zer deskubritu ote nuen  
zorioneko urte batez?  
ametsak dakarren uzta!

masusta gorri garratza...

zorioneko ordu batez  
ausartu nintzen sasian  
ustez modu ikasian  
zorioneko ordu batez  
masustez egitekotan  
nire aurrengo bazka  
zer deskubritu ote nuen  
zorioneko ordu batez?  
sasiaren harramazka!

masusta gorri garratza...

zorioneko une batez  
ez dakit zenbat urratu  
sasian nituen batu  
zorioneko une batez  
larrutu nuen bihotza  
ene bihotz amestia  
zer deskubritu ote nuen  
zorioneko une batez?  
gorriaren garestia!

masusta gorri garratza...

zorioneko uda batez  
sasian berde bost orri  
pinporta txipia gorri  
zorioneko uda batez  
laborritan nuen hartu  
ezpain artean alea  
zer deskubritu ote nuen  
zorioneko uda batez?  
nintzela gordinzalea!

masusta gorri garratza...

2006

---

# CAMILLE

Naturazaleek pentsatu zuten jartzea  
Pirinioetan hartza  
piztia honek eman ziezaien  
benetako mendiaren antza

zientzialariek txip bana ipini zieten belarrian  
—mendiei ez, mendiek ez dute belarririk  
belarra baizik, eta ez guztiek—  
jakiteko nondik nora ibiltzen ziren  
non egiten zuten lo, non bazka...

Baina zer egiten dute orain  
jakin-ustel horiek?  
buruari hazka

Camillek esan zuelako:  
—Hau nazka!  
Txipari heldu eta belarritik aska!

zoaz, Camille  
zoaz gugandik  
urrun, Camille!

nahiz zooan edo zirkuan

sortuak edo luzaz egonak izan  
abere batzuek ez dute ikasten bizitzen  
gizaki zintzoen gisan...

horregatik saiatu behar izaten dute  
naturazaleek eta zientzialariek

ihes egindakoaren peskizan  
handiak direlako

egiten dituen pikardiak  
beldurrak daude ardiak  
otsoak eta guardiak  
eskopeta hartuta hartzaren ehizan

zoaz, Camille  
zoaz gugandik  
urrun, Camille!

egunkari guztiek diote

Camille non ote da, ai ene!  
haren argazkia egin nahi dute baina

Camille bizi da erne:

hartza da, eta gainera... eme!

zoaz, Camille  
zoaz gugandik  
urrun, Camille!

Camille!  
haizeak ikasi duen abestia  
Camille!  
Camille!

artzainak ere  
artzaina beti baita amestia...  
Camille!

zuretzat Auñamendi osoko  
erle guztien ezitia!

zatoz, Camille  
zatoz gugana  
gozo, Camille!

artzainari ez zaizkio  
ardiak asko inporta  
Pirinioetako Printzea da  
jauregi du borda...

atean jo dute!

eta artzainak ez du galdetuko nor da

zatoz, Camille!

zatoz nigana

gose, Camille!

2001

---

# ENE HASERREA

Eta ene haserrea falta bazaizu  
alferrik dira leunak zure begiak  
eta ene musua falta bazaizu  
haizeak ezpainak hostogabetzen dizkizu  
eta ene hitza falta bazaizu  
ezin duzu inolaz ere kantatu  
eta ene ametsa falta bazaizu  
nondik sortuko duzu esperantza  
eta ene oroitzapena falta bazaizu  
zertarako bakarrik paseatu  
eta ene gorputza falta bazaizu  
biluzik zoaz

1976

Musika: Imanol



---

# ONE BALLAD FOR THE RAVENS

*the ravens of black feathers*  
*the ravens of white pen*

Eskerrik asko senide onak  
poetak luma zuriko  
banekien ez ninduzuela  
itolarrian utziko  
zatozte denok untziko  
berriro elkar besarkatzeak  
ez nau poztutzen gutisko  
zuen eskas egin nuen sarri  
nenbilela urrutiko  
mendan edo huriko  
zuek noiz irakurriko

nork du merezi lumadunetan  
poesiaren koroia  
ereintzaren hostoan dabil  
belea edo erroia  
mihina ez du herdoia

mutuko ahal da behin betirako  
erresiñola etoia  
gure arraza ez da izanen  
bere kantuen morroia  
halaxe aitortzen ohi da  
beleak jo zuen goia

gora dezadan moko betean  
kaiolako ez den kanta  
haren berdinek ez du basoak  
hasten bagara karranka  
ze sinfonia xarmanta  
hura bai ezti hura bai eder  
hura ez baita marranta  
hura entzuteak bihotza hustu  
egiten dit tantaz tanta  
esaeretan esanda  
belea berdintzen lan da

poeta zaharron bizimodua  
ez da gauza erosoia  
sekulan ere ez zaigu falta  
lumakoen erasoia  
hau ez da patu gozoa

entzun baldin baduzue inoiz  
egin nintzela usoa  
sinestazue bele lagunok  
gezurra dela osoa  
ni ez naiz hain inozoa  
belea ez baita zozoa

1989

---

# IKASTEA ETA IKASTEA

Nik irakatsiko dizut  
atzekoz aurrera irakurtzen  
hamar arte zenbatzen  
mihia ahosabaian ziztu egiten  
nik irakatsiko dizut  
harri begidunak jaurtitzen  
habiak ezkututzen  
zinezko gezurrak esaten

baina egun zoaz eskolara

nik irakatsiko dizut  
esna zaudela hegaldatzen  
putzu txipian itotzen  
sagarrak eta sagarrak bereizten  
nik irakatsiko dizut  
azterketetan kopiatzen  
tinta izerditzen  
nire sinadura itxuratzen

baina egun zoaz eskolara

nik irakatsiko dizut  
txoritan ibiltzen  
jotzen duten doinuan ez dantzatzen  
hankak baino burua arinago izaten  
nik irakatsiko dizut  
Eiffel dorrea askatzen  
lotsatu gabe galdetzen  
ikasitakoa ahanzten

baina egun zoaz eskolara

nik irakatsiko dizut  
berba zatarrak esaten  
hormetan idazten  
hanka plateran sartzen  
nik irakatsiko dizut  
iltzeak oker sartzen  
eta zeure atzamarra mailuka lehertzen  
nik irakatsiko dizut  
ez dakidan gitarra jotzen  
ni bezalakoa ez izaten  
nik irakatsiko dizut  
dena kolokan jartzen

baina egun zoaz eskolara

bihar bihar piper egiten

irakatsiko dizut bihar

Greziako uharte txipi batera

joanen gara bizikletan

eta zuk Arkimederen teorema

irakatsiko didazu zuk

ni arduragabekeria hutsean

hondoratzen naizela ni

1991

---

# EZ ZAITUT GATIBU NAHI

Ez zaitut gatibu nahi  
gatibu nahi ez baitut

ni gatibu nadukana gatibu da besteren  
ni gatibu nadukana gatibu da besteren  
ezin du nigana  
zaila da libre izaten librea izan baino lehen

zaila da libre izaten librea izan baino lehen  
ez zaitut gatibu nahi  
gatibu nahi ez baitut

laztan zaharren gomuta inoiz ez da lazтана  
laztan zaharren gomuta inoiz ez da lazтана  
baizikan laztura  
ahaztu gabe dut ahaztua zure eskuen lazтана

ahaztu gabe dut ahaztua zure eskuen lazтана  
ez zaitut gatibu nahi  
gatibu nahi ez baitut

maitasunaren oroitza ez baita maitasuna  
maitasunaren oroitza ez baita maitasuna  
baizikan asuna  
ez dut berriro ikasi nahi bakardadeko otoitza  
  
ez dut berriro ikasi nahi bakardadeko otoitza  
ez zaitut gatibu nahi  
gatibu nahi ez baitut

1992

Musika: Anton Latxa



---

# SORGINAREN ZURGINA

Zer ote dakar berri  
ontziak portura  
sorginaren zurginak  
behar duen zura

Libanoko zedroa  
Norteko haritza  
ez ahal zaizu ahaztuko  
emandako hitza

zuretzat jasoko dut  
etxe bat egurrez  
munduari bisita  
egiteko urez

zuretzat josiko dut  
kadira bat txotxex  
sua piztu dezazun  
zaudenean hotzez

zurretzat jarriko dut  
ohe bat abarrez  
biok bertan etzanda  
egiteko amets

trintxa mailu eskoadra  
zerra eskobila  
zurginaren sorgina  
dena da txirbila

2002

---

# ZURE BEGIETAN

Zure begietan  
urratu nuen  
goiza

zure bularretan  
lurperatu nuen  
eguzkia

zure hortzetan  
hozkatu nuen  
haserrea

zure hitzetan  
gorde nuen  
poema

zure soinean  
galdu nituen  
eskuak

zure ezpainenetan  
ahantzi nituen  
neureak

1976

Musika: Peio Serbielle

---

# ERABAKIA

a, sarearen zarata!  
saltegiko sarearen zarata!  
sarearen zarata saltegia zarratzean!

husten dira bulegoak  
betetzen dira autobusak  
ez dabil inor karriketean  
helikopteroak ere erretiratu egin dira  
ilargiak salatuta

a, sarearen zarata!  
saltegiko sarearen zarata!  
sarearen zarata saltegia zarratzean!

bizitzen hasteko tenorea da  
esaten digute saltegiko sareek  
gillotina bezala jaisten direnean  
gure burua  
beti lehengo lepotik eduki ez dezagun

a, sarearen zarata!  
saltegiko sarearen zarata!  
sarearen zarata saltegia zarratzean!

sua eskatuko diot  
aurrena topatuko dudan oinezkoari  
ez dut erretzen  
baina bizitzen hasteko tenorea da  
besteren lepotik

a, sarearen zarata!  
ordua ere kenduko diot

2005

---

# LAGUN ZAHARRA

Zakarkeriarik gabe joko du atean  
baina nik aurrerakoa agindu baino lehen  
sartuko da lasai deitu ez dioten gelan  
hi al hintzen?

hi al hintzen?

amaitu da kreditua eginen dit agurra  
gezur damuan, sentituko balu bezala  
pobrearen poza beti izaten da laburra

hi al hintzen?

ez diat dei egin baina ez nauk haserretuko  
zenbat dudan maitatu zenbat maitatu nauten  
oheko izaretan dauzkak zimurrak lekuko

ez ditiat alferretan bota hainbat neke  
kreditua amaitu zaidak baina hik behintzat  
ez nauk ikusiko zotinka mailegu eske

entzungor eginik zabalduko du armairua  
nire pilda higatuak maletan sartzeko  
luze hoztuko da egun horretako apairua

aizak hi, uztak mesedez hor bertan arropa  
bidaiarako aski diat kopa bete azken  
eta buruan dauzkadan hiru mila koplak

hi al hintzen?

bai, heu izanen haiz... zabalduko duk atea...  
goazen jauna, zu aurrena, bai, hemendik duzu...  
eta ez zaidak ahantziko eskupekoa ematea

hi al hintzen?

heu izanen haiz, bai... eta munduan behera  
munduan behera joko diat harro plantan  
hi lagun zahar bat bahintz bezain barkabera